

**आकाशवाणी**

खास-खास खबरां:-

1. लोकसभा च महिला आरक्षण लागू करने आला संवैधानिक संशोधन बिल पास नई होई सकेआ।
2. गृहमंत्री अमित शाह होरें आखेआ जे विपक्ष दे रवेइये करी महिलायें गी लोकसभा ते विधानसभा च 33 प्रतिशत आरक्षण नई थोग।
3. चुनाव आयोग नै तमिलनाडू ते पच्छिम बंगाल च विधानसभा चुनाएं ते उपचुनाएं शा पैहले 865 करोड़ रुपें शा बद्ध मुल्लै दी अवैध बरामदगी कीती ऐ।
4. होर्मुज जल डमरु मध्य दी सुरक्षा आस्तै UK ते फ्रांस दी पैहलकदमी च शामिल होने लेई भारत गी साद्दा थोआ ऐ।
5. ईराना नै खबरदार कीता ऐ जे अमरीका आसेआ ओदी बंदरगाहें गी निशाना बनाए जाने पर जवाबी कारवाई कीती जाहग।
6. महिला क्रिकेट च कल रातीं डरबन च खेड्डे गेदे पैहले टी-20 अंतराष्ट्रीय मैच च दक्खनी अफ्रीका नै भारत गी 6 विकेटें कन्नै हराया।

<><><><><><>

**LS- Women's reservation**

लोकसभा च कल संविधान च 131में संशोधन सरबन्धी विधेयक पास नई होई सकेआ। इस बिल च लोकसभा ते राज्यें दिएं विधानसभाएं च महिलाएं लेई इक-तिहाई सीटें आरक्षित रक्खने दा प्रावधान हा। लोकसभा च मजूद कुल 528 सदस्यें चा 298 सांसदें एहदे पक्ख च जिसलै के 230 ने एहदे बरोध च मतदान कीता- जेहड़ा दो-तिहाई बहुमत कोला घट्ट हा। लोकसभा अध्यक्ष ओम बिरला होरें मतदान दा नतीजा घोशत करदे होई आखेआ जे इस विधेयक गी पारित करने लेई लोड़चदा बहुमत नई मिलने करी इसी अगगे बधाना मुमकन नई ऐ। एहदे परैन्त संसदी मामलें दे मंत्री किरन रिजिजू होरें आखेआ जे परिसीमन बिल- 2026 ते केंद्र शासित प्रदेशें दे कानूनें सरबन्धी संशोधन बिल सने दशुं होर बिल संविधान च 131में संशोधनें आले विधेयक कन्नै जुड़े दे नए इसकरियै उश्नेंगी पास करने लेई सदन च पेश नई कीता जाहग। उ'नें विपक्ष पर महिलाएं गी आरक्षण च अड़चन पाने दा आरोप बी लाया।

<><><><><><>

## HM -Women Reservation

केन्द्रीय गृहमंत्री अमित शाह होरें आखेआ ऐ जे कल लोकसभा च कांग्रेस- TMC- DMK ते समाजवादी पार्टी नै नारी शक्ति वंदन अधिनियम च संविधानिक संशोधन आले विधेयक गी पास नैई होन दिता। इक सोशल मीडिया पोस्ट च गृहमंत्री होरें आखेआ जे इस बिल दे नामंजूर होने करी महिलाएं गी थोने आलें 33 प्रतिशत आरक्षण पर रोक लगगी ऐ ते दुख इस गल्ला दा ऐ जे विपक्ष इस गल्ला पर खुशी मना रदा ऐ। गृहमंत्री होरें विपक्षी पार्टियें दी नुक्ताचीनी करदे होई आखेआ जे एह मामला नारी शक्ति दे अपमान कन्नै जुड़े दा ऐ ते अस इस्सी बर्दाश्त नैई करगे। उनें आखेआ जे विपक्ष गी महिलाएं दे गुस्से दा सामना- 2029 दे लोकसभा चुनाएं दे इलावा हर इक चुनाव ते हर इक थाहर करना पौग।

<><><><><><>

## Naidu -Women's Bill

नागर विमानन मंत्री के. राममोहन नायडू होरें संसद च महिला आरक्षण विधेयक गी रोकने लेई कांग्रेस दे नेतृत्व च बरोधी धड़े दी सख्त निंदेआ कीती ऐ। सोशल मीडिया पोस्ट में श्री नायडू होरें आखेआ जे जिसलै देश महिला सशक्तिकरण दी दिशा च महत्वपूर्ण गैह पुट्टा करदा ऐ तां नेहू समें च विपक्ष ने साथ देने दे बजाय रूकावट पाने दी बत चुनी ऐ। उनें आखेआ जे विधेयक दा बरोध करना छड़ा राजनीतिक दिखावा नैई ऐए सगुआं देश भरै दिएं महिलाएं लेई मौकें गी सिद्धे-सिद्धे नां करना ऐ। केन्द्री मंत्री होरें आखेआ जे महिला आरक्षण विधेयक लोकतांत्रिक प्रक्रिया च महिलाएं लेई न्याय गरिमा ते उचित प्रतिनिधित्व दी यकीनी करने कन्नै जुड़े दा ऐ।

<><><><><><>

## Election Commission

चुनाव आयोग नै तमिलनाडू ते पच्छिम बंगाल च होने आले विधानसभा चुनाएं शा पैहले कथाकथित 865 करोड़ रपे दी अवैध जब्त करने दी गल्ल आकखी ऐ। आयोग मुजब 26 फरवरी गी चुनाव सरबन्धी नियमें दे सक्रिय होने दे बाद पच्छिम बंगाल च 427 करोड़ रपे दी अवैध बरामदगी होई ऐ- जिंदे च नकदी- शराब- नशीले पदार्थ ते दूइयां चीजां बस्ता शामिल ऐ। तौआई तमिनाडू च 438 करोड़ रपे दी अवैध बरामदगी होई ऐ। चुनाव आयोग नै दस्सेआ ऐ जे 5 जहार शा बद्ध Flying Squared टीमां ते 5

जहार 3 सौ बद्धा निगरानी टीमां दौनें राज्यें च आदर्श आचार संहिता गी सख्ती कन्नै लागू करने लेई तैनात कीती गेदियां न।

<><><><><><>

### India-UK- France -Hormuz

भारत नै अधिकारिक तौर पर इस गल्लै दी पुष्टि कीती ऐ जे युनाइटेड किंगडम ते फ्रांस आसेआ होर्मोज जल डमरु मध्य राएं समुन्द्री यातायात गी सुरक्षित बनाने लेई कीती जा रदी पैहलकदमी च शामिल होने दा साद्दा थोआ ऐ। विदेशमंत्रालय दे प्रवक्ता रंधीर जयसवाल होरें अपने सप्ताहिक मीडिया सम्बोधन च दस्सेआ जे दुनिया दे सब्भनें शा महत्वपूर्ण ऊर्जा गलियारें दी राक्खी आस्तै अंतराष्ट्रीय समुदाय दे जतनें च शामिल होने लेई साद्दा दिता गेआ ऐ। होर्मुज राएं अंतराष्ट्रीय तेल कारोबार दा 20 प्रतिशत संचालित हुंदा ऐ।

<><><><><><>

### Iran Warns

ईरान नै खबरदार कीता ऐ जे अमरीका आसेआ ओदी बंदरगाहें गी निशाना बनाए जाने पर जवाबी कारवाई कीती जाहग। ईरान नै होर्मुज जल डमरु मध्य राएं जहाजें दी आओ-जाई पर किश शर्ता बी रक्खियां न। ईरान दे विदेश मंत्रालय दे प्रवक्ता इस्माईल अरागची होरें इस सरबंध्य च अपने विदेश मंत्री हुंदे आसेया दिते गेदे इक ब्यानै पर सफाई बी दिती। इक न्यूज चैनल मुजब उनें दस्सेआ जे होर्मुज जल डमरु मध्य राएं जहाजें दी आओ-जाई गी ईरान आसेआ इक निर्धारित रस्ते परां गै होन दिता जाहग।

<><><><><><>

### Iran -Uranium Transfer Claim

ईरान ने अमरीका दे राष्ट्रपति डॉनल्ड ट्रम्प हुंदे ओकड़े दावें गी खारिज करी दिता ऐ जेहदे च उनें आखेआ हा जे ईरान अपना समृद्ध यूरेनियम अमरीका गी मुंतकिल करने लेई राजी होई गेआ ऐ। ईरान दे विदेश मंत्रालय दे प्रवक्ता इस्माइल बगाई होरें गलाया जे ईरान कुसै बी हालात च नेही गैह नेई पुट्टग। उंदी एह टिप्पणी अमरीका दे राष्ट्रपति डॉनल्ड ट्रम्प हुंशदे उस बयान दे बाद आई ऐ जेहदे च उनें आखेआ हा जे ईरान- अमरीका दे कन्नै चला करदी गल्लबात च हर गल्लै पर सैहमत होई गेआ ऐ। एहदे च ईरान थमां सांझे तौर उप्पर समृद्ध यूरेनियम गी कड़डियै अमरीका लेई जाने

दी योजना बी शामिल ऐ। बगाई होरें होर्मुज जल डमरू मध्य दे सरबंध्य च अमरीकी अधिकारियें दिएं टिप्पणियें दी बी निंदेआ कीती ते उ'नें गलत करार दिता ऐ।

<><><><><><>

### President/VP/PM- Condolences

राष्ट्रपति द्रौपदी मुर्मू- उपराष्ट्रपति सी.पी. राधाकृष्णन ते प्रधानमंत्री नरेन्द्र मोदी होरें कोयम्बटूर तमिलनाडू च सिडक हादसे च होए दे जानी नुकसान पर अफसोस प्रगट कीता ऐ। एह हादसा कल संजा वलपराई घाट सिडकै पर होआ- जिस्सलै केरल थमां 16एं लोकें गी लेइयै आवा रदी इक वैन पहाड़ी थमां थल्लै रुलकी गई। हादसे च 10 लोकें दी मारे जाने ते कैई होरनें दे जखमी होने दी खबर ऐ। जखिमियें गी कोलै दे अस्पताल च दाखल कराया गेआ ऐ।

<><><><><><>

### Naval Commander Conf

नौसेना कमांडर सम्मेलन दा पैहला चरण कल नमीं दिल्ली च संपन्न होआ। रक्षा मंत्रालय ने दस्सेआ ऐ जे चार दिनें दे इस सम्मेलन दरान भारती नौसेना दी परिचालन ते समग्री सरबंध्यी तैयारियें- बुनियादी ढांचे- रसद ते मनुक्खी संसाधनें आहली पैहलकदमिएं दी व्यापक समीक्षा कीती गई। इस दरान पच्छिम एशिया च चला करदे संघर्ष गी दिक्खदे होई मजूदा परिचालन वातावरण दा बी आंकलन कीता गेआ। सम्मेलन च नौसेना प्रमुख एडमिरल दिनेश कुमार त्रिपाठी होरें भारती नौसेना दी समुंदरी सुरक्षा रणनीति दे बारे च जानकारी दिती। एडमिरल त्रिपाठी होरें सागर मंथन दा बी आयोजन कीता। इस मंच ने नौसेना दे शीर्ष नेतृत्व ते विशे-विशेषज्ञें बश्कार रक्षा सरबंध्यी शोध ते विकास च सुधार सने उद्योग दी मती भागीदारी दे माध्यम कन्ने समर्थ विकास गी बंधाने पर चर्चा गी बी सौक्खा बनाया ऐ।

<><><><><><>

### Womens T-20 Cricket

महिला क्रिकेट च- डरबन च कल रातीं खेड्ढे गेदे टी-20 अंतराष्ट्रीय मैच च दक्खनी अफ्रीका नै भारत गी 6 विकेटें कन्ने हराया। श्रृंखला दे पैहले मैच च मेजबान दक्खनी अफ्रीका नै 158 रन्ज दे लक्ष्य गी 19 इशारिया इक ओवरें च हासल करी लैता। एदे शा पैहले दक्खनी अफ्रीका नै टॉस जित्तियै फिलडिंग करने दा फैसला कीता। भारत नै

पैहले बल्लेबाजी करदे होई 7 विकेटें दे नुकसान पर 157 रन्ज निर्धारित 20 ओवरें च बनाए। कप्तान हरमनप्रीत नै नाबाद 47 रन्ज बनाए। अगला मैच इस्से थाहर तारे खेड्ढेया जाहग जिस्सलै के श्रृंखला दा त्रीया मैच इस महीने दी 22 तरीक गी ते चौथा मैच 25 तरीक गी जोहार्नसबर्ग च खेड्ढेया जाहग।

<><><><><><>